


**TEZAU LITURGIC**  
**17 MARTIE**

**SLUJBA**  
**SF. IERARH**  
**GURIE KARPOV,**  
**ARHIEPISCOPUL**  
**TAVRICESKULUI**



**MOSCOVA, 2000**



# Служба святителю Гурию, архиепископу Таврическому

## На велицей вечерне

Блажен муж: 1-й антифон.

На Господи, возвах: стихиры на 8, глас 5.

Подобен: Радуйся:

Днесь светло торжествует Крымская земля, /  
прославляюще своего великого молитвенника. /  
Просиял бо еси днесь яко светильник  
огнезрачный, / и ревностный поборник веры  
православныя. / Гурие преславне, //  
молитвенниче о душах наших  
Житие твое светлостию добродетелей украшено,  
/ облистает Крымскую землю. / Рака же мощей  
твоих, / всем с верою к ней приходящим, / лучи  
чудес источает, / и ниспосылает многи чудеса  
просящим. / Гурие преславне, // заступниче  
душ наших.  
Радуйся роде всечестный / служителей Церкви  
Божия, / умудривый свое чадо, / и просветивый  
е словом истины. / Радуйся Отечество наше,  
земле Русская, новый вертограде Господень,  
израстивый нам Гурия преславного, // правыя  
веры насадителя.  
Измлада научен словесем спасительным, /

смирением, терпением и многими добродетельми украшен. / Любви к ближним источниче, / Гурие всечестне, // лика святительскаго удобрение.

Подобник был еси, / духовнаго учителя твоего, богоблаженнаго Иннокентия, / ревностнаго архипастыря Церкви Божия, / Евангелия премудраго благовестника / и многих языков наставника, / Гурие преславне, // ходатаю спасения душ наших.

С кротостию и смирением, наипаче же с любовью уча отроки иным языкам / граду Саратову явился еси смиренный служитель и отроком во благочестии наставник, / Гурие священнейший, // Бога непрестанно моли о воспевающих тя.

Слава, глас 1:

Приидите православных множество, / похвальныя песни принесем угоднику Божию, / предивному Гурию, / се бо яко финикс прозябший в дому Божии, / процвел яко крин сельный в Китайстей стране, / созидаю Церковь Божию и утверждая люди в вере православней, // образом жития твоего, Гурие блаженне.

И ныне, Богородичен.

Вход. Прокимен дне. И чтения святителю 3.

## Притчей чтение (главы 3 и 8):

Память праведнаго с похвалами, и благословение Господне на главе его. / Блажен человек, иже обрете Премудрость, и смертен, иже уведет разум. / Лучше бо Сию куповати, нежели злата и сребра сокровища. / Честнейшая же есть камней многоценных, все же честное недостойно Ея есть. / Долгота бо дней и лета живота в деснице Ея, в шуйце же Ея богатство и слава. / От уст Ея исходит правда, закон же и милость на языке носит. / Послушайте убо Мене, о чада, честная бо реку: и блажен человек, иже пути Моя сохранит; / исходи бо Мои, исходи живота, и уготовляется хотение от Господа. / Сего ради молю вас и предлагаю Мой глас сыновом человеческим: / яко Аз премудрость устроих, совет и разум, и смысл Аз призвах. / Мой совет и утверждение, Мой разум, Моя же крепость. / Аз Мене любящая люблю, ищущии же Мене обрящут благодать. / Разумейте убо, незлобивии, коварство, ненаказании же, прилагайте сердца. / Послушайте Мене и паки, честная бо реку: и отверзу от устен правая, / яко истине поучится гортань Моя, мерзки же предо Мною устны лживыя. / С правдою вси глаголы уст Моих: ничтоже в них стропотно, ниже развращенно. / Вся права суть разумевающим и проста обретающим разум. /

Научаю бо вас истине, да будет о Господе надежда ваша и исполнитесь Духа.

Притчей чтение (главы 10 и 11):

Уста праведнаго каплют премудрость, язык же неправеднаго погибнет. / Устне мужей праведных каплют благодати, уста же нечестивых развращаются. / Мерила льстивая мерзость пред Господем, вес же праведный приятен Ему. / Идеже аще видет досаждение, тамо и безчестие: уста же смиренных поучаются премудрости. / Совершение правых наставит их, и поползновение отрицающихся упасет их. / Не пользуют имения в день ярости, правда же избавит от смерти. / Умер праведный, остави раскаяние, наручна же бывает и посмеятельна нечестивых пагуба. / Правда непорочнаго исправляет пути, в нечестие же падает неправда. / Правда мужей правых избавит их: безсоветием же пленяются беззаконнии. / Скончавшуся мужу праведну, не погибнет надежда, похвала же нечестивых погибнет. / Праведник от лова убежит, вместо же его предастся нечестивый. / Во устех нечестивых сеть гражданом, чувство же праведных благоспешное. / Во благих праведных исправится град, и в погибели нечестивых радование. / Во благословении правых

возвысится град, усты же нечестивых  
раскопается. / Ругается гражданином лишенный  
разума, муж же мудрый безмолвие водит.

Премудрости Соломоновы чтение (глава 4):  
Праведник, аще постигнет скончаться, в покои  
будет. / Старость бо честна не многолетна, ниже  
в числе лет исчитается. / Седина же есть  
мудрость человеком, и возраст старости житие  
нескверное. / Благоугоден Богу быв,  
возлюблен бысть, и живой посреде грешник  
преставлен бысть. / Восхищен бысть, да не  
злоба изменит разума его, или лесь прельстит  
душу его. / Рачение бо злобы помрачает добрая,  
и парение похоти пременяет ум незлобив. /  
Скончався в мале, исполни лета долга. Угодна бо  
бе Господеву душа его, сего ради потщася от  
среды лукавствия. / Люди же видевше и не  
разумевше, ниже положше в помышлении  
такое. / Яко благодать и милость в  
преподобных Его, и посещение во избранных  
Его.

На литии стихиры святого, глас 4:  
Днесь созываются люди Божии / и  
ликовствует Таврическая страна, / наста бо  
память преславного угодника Христова, / лютыя  
страдания претерпевшаго, / Господеву

данный обет соблюдоваго, / иноческий чин  
приимшаго, / и душу свою во всемошняя руке  
Его предаваго. // Ныне бо молится о чтущих  
святуу память его.

Научаясь во граде святаго Петра, / образом  
добрым братии в трудех и молитвах явился еси,  
/ сего ради Церковь во пресвитера тя постави, /  
и проповедати в дальнюю восточную страну  
посла / ты же тамо много трудился еси,  
насаждая вертоград Божий. // Моли спастися  
всем нам.

Слава, глас 2:

Приидите, верных собори, / приидите, составим  
лик, / торжествующе и Бога прославляюще, / в  
радостный праздник святителя Гурия, / сей бо  
вшел в радость Господню, / равный апостолам  
от народа наречен бысть, / велии бо труды  
подъял еси на востоце, / и ныне с мученики  
китайскими, / молит Троидинаго Бога, // о  
земнем Отечестве нашем.

И ныне, глас тойже:

Тебе, о Богомати, вси ныне слезно взываем: /  
вонми предстательству святителя Гурия о нас, /  
и Сыну Твоему молитвы вознеси, / о спасении  
душ наших.

На стиховне стихирь, глас 2.

Подобен: Доме Евфрафов:

Земле Крымская, / святой граде Симферополе,  
/ украшай твой дом, / в немже Божественный /  
святитель Гурий прославлен бысть.

Стих: Уста моя возглаголют премудрость, / и  
поучение сердца моего разум.

Церковь наша, / красуйся и ликуй, / се бо чадом  
твоим / Гурий священнейший, Престолу  
Владычню // во славе предстоит, радуящися.

Стих: Уста праведнаго поучатся премудрости, /  
и язык его возглаголет суд.

Святити вси земли Крымския, / узрите новаго  
собрата вашего, / той бо понесе труды мнози, //  
в земнем Отечестве вашем.

Слава, глас 1:

Град Симферополь преславный, / ныне  
ликовствует и благочестием твоим хвалится. /  
Днесь церковь святых апостолов Петра и Павла,  
/ сохраняюще многоцелебныя мощи твоя, / яко  
пребогатое сокровище, / благодать Божию  
приемлет. / Днесь людие земли Крымския, / и  
всех Церкви стекаются на поклонение, //  
прославляя честную твою память Гурие  
доброхвальне.

И ныне, Богородичен, глас тойже.

На благословении хлебов Богородице  
Дево: дважды, и тропарь святителю единойжды.

Тропарь, глас 3:

Духом Божиим водимъ, святителю отче Гурие, /  
страну Китайскую светом Евангелия  
просветивый, / ересей и расколов в земле  
Тавричестей добрый победителю. / Слова  
Христова в ней усердный насадителю, / тем же  
и о чтуще многоцелебныя мощи твоя, / моли  
Христа Бога / разум истины нам даровати / и  
душам нашим велию милость.

Ин тропарь, глас 4:

Земли китайския просветителю / и Слова Божия  
в ней усердный насадителю, / Церкви  
Российския похвало и земли нашея  
утверждение, / мучеников наставниче и о людех  
твоих к Богу теплый молитвенниче, / святителю  
отче Гурие, моли Христа Бога / мир Отечеству  
нашему даровати // и душам нашим велию  
милость.

### **На утрени**

По 1-м стихословии седален, глас 7:

От юности святителю Бога возлюбил еси Гурие  
блаженне, во бдениих и пощениих, и иных  
трудех много подвизался еси, темже и явился

еси жилище Духа Святаго, Егоже действием светло ныне украшен, моли спасти нас воспевающих тя.

Слава, и ныне:

Из глубины зол вопием ти: виждь, Владычице, скорбь нашу, и не отвержи нас во обстоянии сущих. Услыши вопль наш, и покрый ны ризою Твоею, славно бо прославися.

По 2-м стихословии седален, глас 4:

Святое послушание восприим, и святительства одеждою облечен, Гурие угодниче Христов, учитель добр народу Божию бывает, словом, верою и делы, люди благочестию научая и путь еже ко спасению показуя.

Слава, и ныне:

Едина крепкая и теплая Предстательнице роду человеческому, Богородице Дево, непрестанно молися со святителем Гурием, и святыми мученицы иже в царствующем граде Пекине, от безбожных пострадавшими, мнози муки претерпевшими, согрешений оставление даровати, всем поклоняющимся верою Богомужному Рождеству Твоему.

Величание:

Величаем тя, / святителю отче наш Гурие, / и  
чтим святую память твою, / ты бо молиши о нас  
/ Христа Бога нашего.

Псалом избранный: Услышите сия вси языцы:

По полиелеи седален, глас 6:

Во вся концы страны Китайския, и земли  
Таврической протекоша глаголы твоя  
равноапостольныя, святителю отче Гурие,  
научил бо еси Троицу Триипостасную  
богословити во Едином Божестве.

Слава, и ныне:

Утреннюююще, Всепетая взирая на Образ иконы  
Твоея со святителем вопием ти: спаси ны, ты бо  
еси едина Заступнице наша усердная, разве  
Тебе иныя не вемы.

Степенна, 1-й антифон 4-го гласа.

Прокимен, глас 4: Уста моя возглаголют  
премудрость, / и поучение сердца моего разум.  
Стих: Услышите сия, вси языцы, внушите, вси  
живущий по вселенней. Всякое дыхание:

Евангелие от Иоанна, зачало 36.

По Евангелии стихира, глас 6:

Непрестанною молитвою, / учительными  
словесы твоими, / велиим милосердием и

добродетельным житием, / образ верным был  
еси, богомудре Гурие, / всех ко Христу приводя,  
/ и на путь спасения наставляя: / твоего  
отеческаго заступления не лиши и нас, /  
великий святителю Божий, // почитающих  
святую память твою.

Канон святителю Гурию, глас 6.

Песнь 1

Ирмос: Яко по суху, пешешествовав Израиль /  
по бездне стопами, / гонителя фараона / видя  
потопляема, // Богу победную песнь поим,  
вопяше.

Припев: Святителю отче наш Гурие, моли Бога о  
нас!

От юности твоея Христу последуя Церкви Божия  
прилепился еси / ум свой горе возвысивши /  
поприще земнаго жития твоего невозбранно  
прешел, / щедрою десницею твоею милостыню  
просящим подавал еси, / Гурие всемилостиве, /  
тщету земнаго стажания проповедавая / земная  
на небесная пременил еси богомудре.

Купца премудраго себе соделав, ты, святителю,  
Бисер Многоценен — Христа обрел еси / сего  
ради вся земная оставльши иноческим ликом  
сопричелся еси

Благодать священства восприим, утешение  
велие и духовное укрепление обрел еси в

служении Святых Христовых Тайн, Тех и нас сподоби присно причащаться, к Богу молитвами твоими.

Богородичен: Спаси нас от всяких бед, Всемилостивая Владычице Богородице, и Твоими молитвами к Сыну Твоему и Богу нашему, исцели от греховных болезни страждущия души наша.

### Песнь 3

Ирмос: Несть свят, / якоже Ты, Господи Боже мой, / вознесый рог верных Твоих, Блаже, / и утвердивый нас на камени // исповедания Твоего.

Молитвенные подвиги и труды твоя, яже в земли Китайстей, яко труба богогласная вопиют к Богу, проповедуя житие твое ангелоподобное Божественное Евангелие и писания отеческая проповедал еси языкам царства Китайскаго, сего ради царствующий град Пекин и вся страна восточная Благовестником своим нарекоша тя.

Троицу Святую, Отца и Сына, и Святаго Утешителя Духа, исповедати православно роди языческие научил еси, / тем же и люди непросвещенныя ко Христу привел еси, пастырю предивный, / в молитве непрестанно пребывая

Богородичен: Множества грехов люте обдержат души наша, Ты же, Пречистая Богомати, молитвами Твоими ко Иже от Тебе Рождшемуся пленения сего греховнаго избави и на стезю спасения настави нас.

Ин кондак, глас 8:

Кротости и смирения богомудрый наставниче, милосердия и нестяжания дивный поборниче, явивый свет Христова учения верным людям твоим, не остави нас, святителю отче Гурие, любовьию чтущих святую память твою!

Седален, глас 6:

Образ пастырей истинный явился еси святителю, многи благочестивыя мужи во священство поставляя, Евангельскому житию всех научая, храмы мнози, обители и духовныя школы созидаю, град Симферополь духовно преукрасил еси и молитвами твоими освятил еси. И ныне предстою Престолу Вседержителя, молися о пастырях и людех, молящихся ти.

Слава и ныне, Богородичен:

Образы святыми твоего Божественного лика преукрашена земля Таврическая, Матерь Божия, Сего ради помощь всех нас обогати Пречистая, и да вси народи земли нашея Дево Владычице, ублажающе, Тя возвеличают.

## Песнь 4

Ирмос: Христос моя сила, / Бог и Господь, /  
честная Церковь / боголепно поет, взывающи,  
// от смысла чиста о Господе празднующи.

Добрым делателем явился еси винограда  
Христова, Гурие доброхвальне, егда Церковь  
Божия, посреде языческаго тьмы насажденная,  
доблий плод — святыя мученицы Ему принесе.

Мучеником дивный наставник и учитель  
богомудрый показал ся еси, егда духовная чада  
твоя, купно со священномучеником

Митрофаном, за Имя Христово от братьих своих  
смерть прияли есте и кровьми своими диавола  
посрамили есте

Багряницею кровей и венцы мученическими  
хвалятся ныне чада твоя, зряще Лице Святыя  
Троицы, Святителю Гурие, моли купно с ними,  
спасти души наша.

Богородичен: Госпоже Всепетая

Богородительнице, моя помышления Твоими  
молитвами очистивши, покажи мя благоплодна,  
Мати всех Бога.

## Песнь 5

Ирмос: Божиим светом Твоим, Блаже, /  
утреннюю Ти души любовию озари, молюся, /  
Тя ведети, Слово Божий, / Истиннаго Бога, // от  
мрака греховнаго взывающа.

По послушанию оставив страны восточныя, богомудре, игуменом обители Симоновстей соделался еси, послежде и Ветсем Риме еретические мудрования обличил еси о Правей вере латином свидетельствуя, отче всеблаженне. Льву от колена Иудина уподобился еси, святителю, и тезоименит быв Казанскому просветителю, житию его подражав, ревнитель отеческаго Святаго Правоверия явился еси, научи и нас ревновати о спасении душ наших Промыслом Божиим, рук святительских возложением, изволением Духа Святаго во епископа поставлен бых, богоспасаемому граду Чебоксары истинный учитель благочестия и отец чадолюбивый явился еси, Гурие ангелонравне. Богородичен: Ангельский собор и человеческий род о Тебе радуется, Благодатная Марие, Мати Неискусомужная, Невместимаго бо во чревеместила еси и родила еси Спаса миру.

### Песнь 6

Ирмос: Житейское море / воздвигаемое зря напастей бурею, / к тихому пристанищу Твоему притек, вопию Ти: / возведи от тли живот мой, // Многомилостиве.

Предивный подобник и преемник духовнаго твоего учителя блаженнаго Иннокентия Иркутскаго быв на чувашстей земли, новому

Златоусту — Таврическому Иннокентию последуя, возшел еси на святительский престол, от лет древних Первозванным Апостолом утвержденный, новую паству твою таврическую послушанию, братолюбию и милосердию присно научая.

Рыбаря и Верховнаго сущаго брата наследник, Климента священномученика и Мартина исповедника верный ученик, Гурие священнейший, на высоте апостольскаго престола сидя в ризу смирения облеклся еси и паству твою добре упасл еси

Волка мысленнаго пламенем веры отгнал еси и от звероуловления стадо твое избавил еси, безбожие и ереси из предела Таврическаго изгнав, Гурие ангелонравне, и ныне огради нас от расколов и погибельных ересей, и от духов нечистых восстающих на ны.

Богородичен: Всякаго существа высшее, Слово Божие воплощенно нам родила еси: темже Богородицу Тя устнами и душою проповедуем.

Кондак, глас 8:

Возбранный чудотворче и предивный угодниче Божий, / святителю отче наш Гурие, / Церкви Таврическакия похвало и земли нашея радование, / молитвенное восписуем ти пение, / ты же яко имейя веле дерзновение ко Владыце небесе и

земли, / от всяких страстей, недугов душевных и телесных свободы / да вси во умилении зовем ти: / Радуйся, святителю отче наш Гурие, земли Крымския похвало и утешение!

### Икос

Ангелов Творец и человекон Создатель избра ты от утробы матерния и от корене благочестиваго, предвидя непоколебимую веру твою и апостольския труды твоя, во славу Всесвятаго Имене Своего, освяти и на степени святительства постави, мы же обретше ты новаго светильника и чудотворца со благоговением и любовью поем ти:

Радуйся, родителей твоих благочестивых богомудрый сыне.

Радуйся, правоверия предков наследниче.

Радуйся, кротости и благочестия родительскаго преемниче.

Радуйся, розго райская на земли прозябшая.

Радуйся, маслино плодовитая, елеем милости струпы греховная очищающая.

Радуйся, бане духовная, скверны страстей омывающая.

Радуйся, призывающим тя в помощь помогай.

Радуйся, по молитве волю Божию открываяй.

Радуйся, яко неисцельные болезни по твоим молитвам врачуются.

Радуйся, яко и враски и язвы закрываються.  
Радуйся, нечистых духов от верных отгнание.  
Радуйся, слепых прозрение и глухих слышание.  
Радуйся, святителю отче наш Гурие, земли  
Крымския похвало и утешение!

### Песнь 7

Ирмос: Росодательну убо пещь / содела Ангел /  
преподобным отроком, / халдеи же опаляющее /  
велеие Божие мучителя увеща вопити: //  
благословен еси, Боже отец наших.

Велегласного поборника святых веры почитаем  
тя, святителю Гурие, еретики и хульники, а  
наипаче богомерзкое агарянское зловерие в  
Тавриде, посрамил еси, отпадшия от Церкви, к  
Истине паки возвратил еси, словом Правды  
оглашая

Илие ветхому подобяся, об истинном  
боговедении народа поревновал еси, Святителю  
Гурие, Писанию Божественному неустанно уча,  
премудрости книжней в духовных школах  
пастыри и отроки наставляя  
Праведному Иосифу Обручнику подражая о  
чистых девах и вдовицах сугубое попечение  
имев, училище благочестия и церковь Божию им  
устроил еси, храмом Сретения Господня град  
Симферополь украшая.

Богородичен: Превечно от Отца возсиявша Бога Слова во утробе плотию заченшую вси ублажаем, яко Матерь всех Бога.

## Песнь 8

Ирмос: Из пламене преподобным росу источил еси / и праведнаго жертву водою попалил еси, / вся бо твориши, Христе, токмо еже хотети, // Тя превозносим во вся веки.

От суеты мира сего отложився, посреде мира пребывая, мир, плоть и диавола посрамив, миру распялся еси, в любвеобильном сердце своем непрестанно взывая: Господа пойте дела и превозносите во вся веки.

Имя Сладчайшаго Иисуса на устех и в сердце своем деннонощно имея, образом и подобием Божиим воистину соделался еси, святителю Гурие, научая нас за вся благодарити и непрестанно пети Ему: Господа пойте дела и превозносите во вся веки

Поношение с кротостию претерпевая, побиение от нечестиваго псаломщика со смирением приял отче треблаженнейший, тако и нас научи со смирением претерпевати вся находящая на ны, по грехом нашим и во умилении воспевати: Господа пойте дела и превозносите во вся веки.

Богородичен: Всесвятая Дево, Бога Слова рождшая плотию, душ наших мрак Твоими

молитвами отгнавши, просвети взывающих:  
Господа пойте дела и превозносите во вся веки

## Песнь 9

Ирмос: Бога / человеком невозможно видети, /  
на Негоже не смеют чини ангельстии взирати; /  
Тобою же, Всечистая, явися человеком / Слово  
Воплощенно, / Егоже величающе, / с  
Небесными вои // Тя ублажаем.

Духом с Богом на Небесех, телом же на земли с  
нами неоступно пребывая, моли со апостолы и  
пророки Троицу Святую — Бога нашего, Ей же  
во время земнаго странствия твоего всего себе  
предал еси, болезни наша исцелити и мир  
Отечеству нашему даровати, Святителю Гурие,  
молимся ти

Приносящая ти хваления сия и взывающая ко  
твоему святительскому заступлению не отрини  
нас от лица твоего и испроси прощение  
прегрешений наших, ко твоему благоутробию  
припадающая, Святителю Гурие, тебе усердно  
просим

Иже молитвами твоими исцеление от недугов  
обретшии и спасение от гибели улучивши,  
благодарственные принесем Творцу нашему и  
хвалебные песни, прославляюще великаго  
христианом заступника Гурия всеславнаго

Богородичен: Смоковницу безплодну  
уплодоносившая и безматерних сирот Мати  
Милосердая бывшая, со святителем  
Таврическим Гурием, Сына Твоего умоли,  
помиловати души наша.

Светилен:

Кровию твоею честною от десницы твоея  
истекшею, во дни гонения лютаго на христианы,  
неверныя посрамил еси, гонители и хульники ко  
Христу привел еси, верныя же во Православии  
укрепил еси, Гурие пречудне и ныне, знаменьями  
чудес твоих, подаеши нам твердое упование на  
спасение в День Судный.

Слава, и ныне: Богородичен:

Велие и преславное Рождества Твоего таинство,  
Богорадованная Отроковице и Богомати Дево,  
пророцы проповедаша, апостоли научиша,  
мученицы исповедаша, ангели же воспевают, и  
чловецы поклоняются.

На хвалитех стихиры на 4, глас 8.

Подобен: О преславнаго чудесе:

О, преславнаго чудесе! / Днесь земля  
Таврическая из недр своих мощи твоя  
нетленныя на прославление верным отдает / и  
мнози с верою исцеления чают, / се бо  
новоявленный Таврический святитель Гурий /

вся прошения верных во благо исполняет. /  
Ангели же и человецы ликовствуют, / и демоны с  
воплем прогоними бывают, / мы же взирая на  
образ твой божественный // хвалебныя песни  
тебе приносим.

О, преславнаго чудесе! / Светосиянный и  
божественный день наста, / в оньже мощи  
святителя Господня лобызающе, / и очистим  
себе от всякия скверны плоти и духа, / к бане  
духовной прибегающе / оставление грехов  
приемлем, / и воспоминая равноапостольныя  
подвиги его / сердца наша умащающе вонями  
исправлений его / в покаянии Христу зовуще:  
// угодника Твоего молитвами помилуй нас.

О, преславнаго чудесе! / Ныне мнози чудеса  
являеши нам святителю Гурие, / ибо и персть от  
гроба твоего источает исцеления, / одежды же  
твоя бывают нам во источник чудес / вернии же  
лобызающе чудоточныя мощи твоя, / воспевают  
пастыреначальника Христа // прославльшаго  
святых Своя.

О, преславнаго чудесе! / Какое неисцельныя  
болезни, Гурие богоблаженне, твоими молитвами  
врачуются, / и врачеве удивляются, разве  
может сие быти. / Мы же зряще такового  
угодника Божия, / на рамена своя крест по  
заповеди возложшаго / и во след Господа  
Распятаго грядущаго / вопием

подвигоположнику Христу : // помилуй нас  
молитвами избраннаго Твоего.

Слава, глас 8:

О, преславнаго чудесе! / О Божественнаго к нам  
грешным долготерпения! / Яко умножившимся  
соблазном на земли и вере зело умаленей, /  
умножаются чудеса святителя Гурия. Зрите убо,  
верныя Церкви Христовы чада, / колико может  
молитва праведника, / како древних чудес  
подобие днесь нам является. / Слава Тебе,  
Христе Боже, / яко Ты еси чудодействуяй во  
святых Твоих: / сотвори ны достойны толикыя  
благодати быти, // и радость спасения Твоего  
подаждь нам.

И ныне. Богородичен:

Владычице, приими молитвы раб Твоих, и  
избави нас от всякия нужды и печали.

Славословие великое, и отпуст.

### **На Литургии**

Прокимен, глас 7: Уста моя возглаголют  
премудрость, и поучение сердца моего разум.

Стих: Услышите сия вси языци, внушите  
живущии по вселенней.

Апостол ко Евреем, зачало 335.

Аллилуиа, глас 2: Священницы Твои облекутся в

правду, и преподобнии Твои возрадуются.  
Стих: Внидем в селения Его, поклонимся на  
место, идеже стояте нозе Его.

Евангелие от Матфея, зачало 11.

Причастен: Радуйтесь праведнии о Господе,  
правым подобает похвала.

[Служба святителю и чудотворцу Гурию  
Карпову, архиепископу Таврическому и  
Симферопольскому, составлена **священником  
Василием Печевистым**, клириком г.  
Симферополя]

